



ЗАМАН



Газета издаётся на балкарском языке с 1924 года

Интернет-версия: gazeta.zamankbr.ru[gazeta_zaman](https://www.instagram.com/gazeta_zaman)КЪАБАРТЫ-МАЛКЪАР РЕСПУБЛИКАНЫ
ПАРЛАМЕНТИНИ ЭМ ПРАВИТЕЛЬСТВОСУНУ ГАЗЕТИ

ВРЕМЯ

ГАЗЕТА ПАРЛАМЕНТА И ПРАВИТЕЛЬСТВА
КАБАРДИНО-БАЛКАРСКОЙ РЕСПУБЛИКИ

ТЮБЕШИУ



Ал жанында – жангы коронавирус инфекцияны жайылыууна хазыр болуу

Казбек Кокков республиканы медицина учреждени-яларыны баш врачлары бла ишчи тюбешуу бардыр-ганды. Ала республикада шендюгю эпидемиология болумну сюзгендиле. КъМР-ни Башчысы республикада, хар жердеча, ОРВИ-ден бла жангы коронавирус инфек-циядан аругъанланы саны ёсгенин эсертгенди. Алай а медиклени усталыкларыны эмда сынауларыны хай-ырындан регион «жангы толкундан» да бет жарыкылы кьутуллугуна ийнанганын айтып, алагъа бу жукъган аругуу къажу къарыуларын-кючлерин аямай кю-решгенлери ючюн жюрек ыразылыгын билдиргоенди.

Тюбешууну кезиунде РФ-ни Саулукъ сакълау мини-стерствосуну СКФО-да штатда болмагъан баш инфек-ционисти КъМР-ни Саулукъ сакълау министрствосуну СПИД-ден сакълануу эмда анга къажу кюреш барды-рыуу жаны бла арасыны баш врачы профессор **Марина Иванова** пандемия салгъан кьоркьуулары юслеринден хапарлагъанды. «Биз башха къырралланы сынауларына таянабыз, Москвада бла Санкт-Петербургда халдан хыйсап этебиз. Аругъанланы саны ёсуп барады. Башха кезиуле бла тенглешдиргенде, коронавирус жукъган-ланы саны 4-5 кереге терк ёседи. Аны бла байламлы саулукъ сакълау бёлумге, артыкъда амбулаторияла-гъа, бек уллу ауурлукъ жетерикди. Стационарла да аны 2-3 ыйыкъдан сезерикдиле», - дегенди.

Ол айтханга кёре, амбулатор службаны иши узакъдан бардырылыр гъа керекди. Нек дегенде «омикрондан» аругъанланы кёбюсюнде ол женгил ётеди. «Биринчи медицина болушлукъ берген бёлум эмда «скорыйле» женгил аругъанлагъа бёлүнселе, медицина кад-рла жетишмей кьаллыкдыла. Кол-центрле къурау, аланы цифрли амалла бла жалчытыу — ол кыйын болумдан кьутулууну амалыды», - деп чертгенди врач-инфекционист.

Аны оюмуна кёре, саусузла бла узакъдан ишлеу врач-ланы, башха медицина ишчилени да кьорууларгъа да боллукъду, кыйын саусузлагъа кёбюрек эс бурургъа да онг чыгъарыкъды.

Профессор Иванова дагъыда коронавирусуна жан-гы штаммы къуру абаданлагъа угъай, сабийлеге да къатылгъанын айырып айтханды. «Аланы арасында саусузланы саны ёсеригине биз хазыр болургъа керек-биз», - дегенди ол.

КъМР-ни саулукъ сакълау министри **Рустам Ка-либатов** кьаллай мадарла этилгенлерини юсюнден билдиргенди, керек болса, госпитальла гъа саусузланы элтиуну маршрутлары да белгиленгендиле дегенди.

Нальчикде 1-чи номерли поликлиниканы баш врачы Аулият Каскулова уа амбулаториялы бёлумге чакъ-рыула 7-8 кереге кёбейгенлерин эсертгенди. Аны бла бирге поликлиникада кол-центрде ишлегенлени саны да 12 адамгъа жетдирилгенди. Сатыу-алыу араладан биринде 1-чи номерли поликлиниканы пункту къурал-ганды. Ол экспресс-тестле бардырады. «Дарманла бизге келтирилгендиле, ол а ишибизге уллу себеплик-ди», - дегенди **Аулият Каскулова**.

Терк болушлукъ бергенни бла катастрофаланы меди-цинасыны арасыны таматасы **Алим Карданов** да арт ыйыкъда аланы службаларына ауурлукъ ёсгенин черт-генди. «Алай бююнлюкде Арада ишлегенле борчларын толтурургъа жетишедиле», - дегенди. Аны оюмуна кёре терк болушлукъ берген службаны жаланда кыйын саусузлагъа чакъырса тынчыракъ боллукъ эди.

Къабарты-Малкъарны Башчысы «122» номери бла бир ара кёп да бармай ишлеп башларыгын, ол рай-онладан келген битеу билдириуленни бирикдилегин айтханды. Андан сора да, КъМР-ни Транспорт эмда жол мюлк министрствосунда Казбек Кокковну буйругъу бла 100 микроавтобусу бла диспетчер служба къурал-ганды. Керек болса, ала да медучрежденияла гъа жиберилликдиле.

Тюбешууну ахырында Казбек Кокков: «Быллай хал бир заманда да болмагъанды, ол себепден башха тюрлю амалла керекдиле. Биз анга хазырбыз. Жангы «толкундан» кьутулур ючюн барыбыз да кьолубуздан келгенни аярыкъ туюлюбюз», - дегенди.

Сюзюу

Казбек Кокков Регионланы айнытыу жаны бла правительстволу комиссияны кенгешине къатышханды

КъМР-ни Башчысы **Казбек Кокков** Реги-онланы айнытыу жаны бла правительстволу комиссияны Россейни Правительствосуну Председателини орунбасары **Марат Хуснул-лини** башчылыгъы бла видеоконференция халда бардырылган жыйылыууна къатыш-ханды. Анда сёз асламысында «Жашау журтла эмда шахарда болум» миллет проект къалай толтурулгъаныны эмда инфраструк-тураны къурау бла байламлы халны юсюнден баргъанды.

Къабарты-Малкъарда 2021 жылда жашау журтладан 514 минг квадрат метрден аслам ишленгенди, ол а 2020 жыл бла тенглешдир-генде 102,8 процентни тутады.

Казбек Кокков инфраструктура проектлени магъаналылыклары, ала жашау журтланы къурулушларын бардырыу гъа кёллендир-генлерин да чертгенди. 2022-2024 жыллада Нальчикде аллай проектлени бир нечасын тамамлар умут барды. Алагъа федерал эмда регион бюджетледен миллиард сомдан артыкъ бёлүрге белгиленеди. Алайды да, Искож микрорайонда автомобиль жолланы топлеринде тартылган инженер ызлагъа тынгылы ремонт этилликди. Ол а халкыны суу бла чырмаусуз жалчытыр гъа онг берликди.

Суу ызла Нальчикде «Восточный», Акъ-Сууда «Эркин Ёзен» гитче районлада, «Мишхидж» коттеджи посёлочка, Хасани-яны жангы юйле ишленирик тийресинде, «Дубки07» эмда «Сосруко» дача районлада тартыллыкдыла.

«Таза суу» миллет проектге тийишлиликде Кишпек, Кенделен, Карагач, Красносельское, Пролетарское, Урван, Лашкута, Баксанёнок, Лячинкъяя, Хушто-Сырт, Белокаменское, Огъары Куркужин, Герпегеж элледе бла Алек-сандровская станицада суу бла жалчытыуу 17 объект ишленгенди эмда жангырылганды.

Быйыл а Бахсан районда бирикген суу ыз ишленирикди. Аны узунлугу 77 километрди, проект багъасы уа 2 миллиард сомдан ар-тыкъды. Анга федерал бюджетден регионнга былтыр октябрде окъуна кредит берилгенди. Проект тамамланса, Бахсан шахар округда, Заюково, Атажукино, Исламей, Баксанёнок, Псычох элледе жашагъан 98 минг чакълы бир адамны таза суу бла жалчытыр гъа кьолдан келликди. Аны бла да кьалмай, жашау журт-ланы къурулушларын бардырыр гъа да онг чыгъарыкъды. Бу ишни быйыл жаз башын-да башларгъа эмда 2023 жылда бошаргъа белгиленеди.

КъМР-ни Башчысыны бла Правительствосуну пресс-службасы.

Проект



Солуу тийреле тапландырыллыкдыла

Збет

Редакцияны кьонагъы



«Болушлугъум керекди деселе, битеу жумушларымы кьоюп, мычымай атланама»

Курданланы Мажирни жашы Магомет, Къабар-ты-Малкъар къырал университетни медицина факультетин бошай туруп, кьаллай усталыкъ бла кюреширигин билгенди.

9 бет

Къайгырыу

Жолда тыйгыч чыкъмазча

КъМР-ни Башчысы Казбек Коков Р-217 «Кавказ» жолда машиналагъа тыйгыч болмаз ючюн, Чегем сууда болжаллы халда кепюр ишлерге буйрукъ берген эди да, бу кюнде аны къурулушу къалай башланганын кере да баргъанды. Республиканы оноучусун битеу ишле жуукъ заманда тамам этилликлерине ышандыргъандыла.

Болжаллы халда ишленген кепюр уллу кепюрге ремонт этилген кезиуде

алайда автомобильле кеп жыйылмазларына себеплик этерикди, къоркъуусулукъну да жалчытырыкъды.

Федерал жолда баш кепюрге тынгылы ремонт этилген кезиуде аны эки метрге кенгертирге, эки ызлы этерге белгиленеди. Аны бла байламлы битеу ишлени къурулушчула быйыл сентябрьде бошаргъа айтадыла.

КъМР-ни Башчысыны бла
Правительствосуну
пресс-службасы.



ПАРЛАМЕНТ

КъМР-ни Парламентини жай сессияда биринчи пленар жыйылыуунда сенатор Улбашланы Мухарбий 2021 жылда тамамлагъан ишлерини эсеплери бла шагъырей этгенди, республикалы законланы проектлери къабыл кёрюлгендиле. Кадрла бла байламлы жумушла да сюзюлгендиле. Жыйылыуну спикер Татьяна Егорова бардыргъанды.

Депутатла жай сессияда биринчи жыйылыуну бардыргъандыла



Тюрлениуле

Биринчиден, повесткагъа тюрлениуле кийрилгендиле. КъМР-ни Парламентини Регламентине тийишлиликде, сессияда биринчи жыйылыуда законла чыгъарыуучу органнга кирмеген партияланы келечилери республиканы социал-экономикасын айнытуугъа кез къарамларын белгили этерге эркиндиле. Аны темасын Парламент кеси сайлайды, быйыл а КъМР-де жол мюлкю айнытууну сорууларына къараргъа белгиленгенди.

Контроль эм регламент комитетни башчысы Кансаланы Еленаны айтханына кере, партияланы келечилерине, ол санда республикада бёлюмлер болмагъанлагъа да, доклад этерге боллукъларыны юсюнден заманында белгили

этилгенди. Болсада аладан жууап келмегенди. Аны себепли бу соруу жыйылыуну повесткасындан кетерилгенди.

Кадрла
Ашабоков Рашид,
Малухова Эмма,
Мурзаканова Марина,
Шорманова Алла
Урван суд районну 2-чи номерли, Нальчик суд участканы 17-чи номерли, Чегем суд районну 1-чи номерли эм Нальчик суд районну 16-чы участкаларыны жарашдырыуучу судьяларыны къуллукъларына къабыл кёрюлгендиле. Аланы кандидатуралары бла депутатланы КъМР-ни Баш сюдюню таматасыны орунбасары Эфендиланы Мурат шагъырей этгенди.

КъМР-ни Контроль-эсеплеучю палатасыны башчысыны орунбасары Сарбашланы

Фатима къуллугъундан эркин этилгенди. Бюджет, налогла эм финанс рынокла жаны бла комитетни башчысы Михаил Афашагов Фатима Магомедовна кеп жылланы толтуруучу власть органлада ишлегенин, кесин бийик профессионалча кёрюлгенди.

Татьяна Егорова да Фатима Магомедовнаны республиканы айнытуугъа уллу къыйын салгъаныны, анга жаммауатда хурмет этилгендин белгилегенди.

Республикалы законла

Ызы бла депутатла республикалы законланы проектлерин сюзюге киришгендиле. «Муниципал къуралууну айнытуугъа кеслерини юлюшлерин къошууну соруулары бла байламлы халкъ жыйылыуулары бар-

дырыргъа эркин этилген жерлени чеклерин тохташдырыуну юсюнден» республикалы закон 1-чи эм 2-чи окъулууда къабыл кёрюлгенди.

жаны бла комитетни башчысы Артур Текушев шагъырей этгенди. Аны айтханына кере, закон федерал излемле бла келишдирилгенди.

«Ветеринарияны юсюнден» законну 1-чи эм 10-чу статьяларына тюзетиуле да сюзюлгендиле.

«КъМР-де шахарлада къурулуш бардырыуну юсюнден» законнга тюзетиуленди депутатла. Къурулуш эм жашау журт-коммунал мюлк жаны бла министр Алим Бербековну айтханына кере, закон федерал излемле бла келишдирилгенди. Сёз административ чеклени азайтууну, къурулушну бардырыуугъа эркинликни берууну юслеринден барады.

«КъМР-ни Парламентини депутатыны статусуну юсюнден» законну 6-чы статьясына тюрлениуле кийрилгендиле. Проект бла жыйылгъанланы республиканы прокурору Николай Хабаров шагъырей этгенди. Закон депутатланы борчларын тохташдырыу, чекле кезиуде бузгъан кезиуде жууапчылыкъ жаны бла праволу болумланы игилендирир мурат бла хазырланганды.

Жыйылыуда Россейни Федерация Советинде КъМР-ни законла чыгъарыуучу органыны келечиси сенатор Улбашланы Мухарбий былтыр тамамлагъан ишини юсюнден билдиргенди. Ол бюджет эм финанс рынокла жаны бла комитетни башчысыны орунбасарыны къуллугъунда къаллай законланы хазырлагъаныны, республикагъа къаллай финанс болушлукъ берилгенини юслеринден билдиргенди. Аны юсюнден толу «Заманны» келир номеринде окъургъа боллукъду.

«Къумалы малчылыкъны юсюнден» республикалы законну бир-бир кесеклери кючлерин тас этгендиле. Ол жаны бла законну проекттин Аграр соруула, табийгъатны хайырланыу, экология эм тегерекдеги къудуретни къоруулау

Башламчылыкъ

Таза сууну аяу барыбызны да борчубузду

Россей Федерацияны Табийгъат байлыкъла эм экология министерствосу «Экология» миллет проектни чеклеринде «Энчи суу объектлени сакълау» федерал программаны бардырады. Анга кере, суу объектлени тийрелери тазалыкъда сакъланырча саулай къыралда «Россейни суу» деген экология акция ётеди. Аны хайыры бла, тегерек-баш тап халгъа келтирилгенинден сора да, жамауатны экология сезимин кючлендирирге да себеплик этиледи.

Бюгюнлюкде акция экологияны игилендириу жаны бла эм уллу башламчылыкъгъа саналады. Сегиз жылны ичинде анга 85 региондан жети миллиондан аслам адам къатышады.

Жыл сайын тамамланган ишлени эсеплеу ючюн, проектни координатору субъектлени арасында рейтинг бардырады. Къабарты-Малкъарда акцияны координатору Табийгъат байлыкъла эм экология министерстводу. Озгъан жылда республика тогъузунчу жерге тийишли болгъаны ахшы жетишимге санарчады. Былтыр акциягъа 12 992 адам къатышханды. Ишлени кезиуде 454 километр чакълы бирде суу ызланы тийрелери тазалангандыла. Субботниклени бардырыргъа республиканы муниципалитетлери, жамауат эм волонтер организацияланы келечилери эм башхала да болушхандыла.

Быллай акцияла суу объектлени тийрелерин таза тутаргъа себеплик этедиле, тёлюле аллай жерле жамауатха эм саулай къыралгъа да магъаналы болгъанларын сезерча эм алагъа аяулу кезден къарарча этерге да болушадыла.

КУРДАНЛАНЫ Сулейман.



ТИКАЛАНЫ
Фатима.

ПРОЕКТ

Солуу тийреле тапландырыллыкдыла

Къабарты-Малкъар Республиканы 100-жыллыгына «Шахарлада тап жашау болумланы кырау» программаны бардырыуу бла байламлы адамала солугъан 12 жер тапландырыллыкды.

Тизмеге Нальчикде Къабарты-Малкъар кырал университетни тийресинде сквер, «Курортный», «Гагаринсквер», Идаров, Мальбахов орамлада болгъан скверле, Ленин эм Тарчоков атлы орам бирге кышулгъан жерде скверле, «Нарт» микрорайонда кыарындашла Амшоковла атлы орамда тургъан сквер да киреди. Андан сора ол саннга Прохладный шахарда Ленин атлы орамда ючюнчю лицейни жери бла алгъын «Победа» колхозну урушха кыатышхан ишчилерине деп ишленген эсгертеме да тюшгенди. Бахсанда бла Дыгулубейде Бахсан орамда орналгъан объектле, Майский шахарда сабийле ойнагъан муниципал майдан, Тырнауузуда ара майданга да тынгылы



ремонт этилликиди.

Бытыр жети объект Къабарты-Малкъарда жашагъанланы арасында онлайн амал бла бардырылгъан кыол кетюрюлюню кетюрюлюне кере айырылганды. Жамауат жерлени айырыуу 2021 жылда 26 апрельде башланып 30 майда ZA.GORODSREDA порталда бардырылганды. Дагыда ол кезиуде чыгъарылгъан

кертюмдюледе, беш жамауат жер аз балла алгъан эдиле. Болсада, Къабарты-Малкъар Республиканы 100-жыллыгыын белгилеуу бла байламлы хазырлануу ишлени кезиуде, КъМР-ни Башчысы **Казбек Коковну** башламчылыгы бла ол объектлени программагъа кышарча онг чыкыганды.

2022 жылда шахарлада жашаргъа тап болумланы

кырауу федерал проектни республикада бардырыгъа уллу хазырлануу ишле этилгендиле, дейди кырулуш эм жашау-журт коммунал мюлк министрни орунбасары **Роман Котченко**. «Уллу магъана гитче шахарлада жамауат айланган эм солугъан жерлени асламысын тапландырыуу да берилгенди. Нек дегенде, ол жерледе байрамланы асламысы этерикдиле, арда адамлада солуп, зауукълукъ да алып турлукъдула», - дегенди Р. Котченко.

Эсигизге салайыкъ, Къабарты-Малкъарны 100-жыллыгына жоралап быйыл республикада иги кесек кырууанчы жумушла бардырыллыкдыла, андан сора да, социал магъаналары болгъан объектле хайырлануу берилгендиле, жамауат жерле тапландырыллыкдыла, деп билдиргендиле республиканы оноучусу пресслужбасындан.

Бизни корр.

Черек райондан



Жер-жерли айырыуу

комиссияда – жангы тамата

Бу кюнледе Черек районну Жер-жерли айырыуу комиссиясы таматасына Къужонланы Рамазан салынганды.

Кесини урунуу жолун Рамазан Исхакович районну Халкны иш бла жалчытуу арасында башлагъан эди. 2002 жылдан бери уа КъМР-ни Айырыуу комиссиясында баш специалистни кыуллугунда эм «Айырыула» Кырал автоматизациялы системаны администратору болуп урунганды.

РФ-ни эм КъМР-ни Сыйлы грамоталары бла сауыгаланганды. Жууапы эм ишин билген специалистге саналады.

Жазыуу тап халгъа келтиргендиле

Къашхатауу элтген жолда онг жанында кыя жухда закий Къайсынны битеу дунягъа белгили «Мир и радость вам, живущие!» деп жазылгъан сёлерин эслемеген хазна адам табылсын. Алай андан харф да тюшюп, жазуу жангыртылыр керекли болуп тура эди.

Ма бу кюнледе Къашхатауу администрациясы башламчылыгы бла, ол иш тамамланганды. Ол жумушну кытхаруучу жашларыбыз Жабелланы Исмайыл бла Шауаланы Кязим тамамлагандыла. Жашла харфланы, жип бла ёрге чыгъарып, алай орнатханыла. Бу жумушну бардырыуу уа предприниматель Уяналаны Магомед ахча болушлукъ этгенди.

КЪАСЫМЛАНЫ Аминат.

Мадар

Юйлеге газ тартыуу бла – алчылананы санында

Къабарты-Малкъар Республика юйлеге газ ызланы тартыуу бошауу бла битеуроссейли рейтингде беш алчы регионну санына киргенди. Аны юсюнден КъМР-ни Правительствоу суну жыйылуунда Россей Федерацияны Президентни субъектлеге газ тартыуу жумушланы бардырыуу бла байламлы берген буюрууланы толтуруу федерал штабны оноучусу, РФ-ни Правительствоу суну Председатели орунбасары Александр Новакны башчылыгында бардырылгъан кенгешде айтылганды.

Тохташдырылгъан мардалагъа кере, алчылананы белгилер ючюн онбир затха кыаралады, ол санда регионда газ ызланы тартыуу программада кыабыл этилген планга, юйлени чеклерине дери газ ызланы келтириуу бла байламлы кыаллай бир келишим толтурулгъанына, газ быргылыны тартханда кыаллай багъала болгъанларына эм башха затланы да эсге аладыла.

Алчы регионланы белгилегенде, табийгъат газ баргъан быргылагъа кыаллай бир юй кышулгъанына артыкъ уллу эс бургандыла. Сагъынылгъан программа республикада 2021 жылда сентябрьде ишлеп тебирегенди. Бююнюлукге газ ыз 1122 юйге кышулургъа керекди, юй иеледен 763 заявка аллынганды, 576 келишим этилгенди, аланы журтасындан кёбюсю толтурулганды. Башхача айтханда, президент программагъа кере газ ызла 355 юйге тартылгандыла. Саулай да битеу республикада табийгъат газ баргъан быргылыны юйлеге дери тартыуу программаны жылны аягына бошаргъа айтадыла, деп билдирдиле республиканы оноучусу пресслужбасындан.

ЭСЕПЛЕ

Жашау журтлагъа танг кышулганды

Къабарты-Малкъарда былтыр хайырланууу 514,4 минг квадрат метр жашау журт берилгенди. Бурунгу жылны кертюмдюсю бла тенгледиргенде ол 2,8 процентге асламыракъ болганды, деп билдиргендиле республиканы Кырулуш эмда жашау журт-коммунал мюлк министрствосундан.

Кырулуш компанияла 39 кёп фатарлы юй (120,4 минг квадрат метр) сюегендиле. Аланы барында да 2025 фатар барды. Бу кертюмдю 23,4 процентге кёбейгенди. Кеси да сагъынылгъан 514,4 минг квадрат метр санында кёп кыалмай тёртден бирин алады. Кыалгъанын а, башхача



айтханда, 394 минг квадрат метрни адамла ишлегендиле. Ол иели юйледиле. Аланы

саны 3386 болады, дегендиле министерствода.

ОМАРЛАНЫ Мурат.

ЖАМАУАТ ПАЛАТА

Кемчиликле ачыкъланнгандыла, планла жарашдырылгандыла

Бу кюнледе Къабарты-Малкъарны Жамауат палатасыны бешинчи кыаууму биринчи жыйылууну бардырганды, анда 2022 жылда аны ишин кыраууу бла байламлы соруулагъа кыаралганды.

Жамауат палатаны Регламентини 17-чи статьясыны 1-чи кесегини 8-чи пунктуна тийишлиликде комиссияла кыралгандыла, палатаны башчысы **Хазратали Бердовну** эм аны орунбасарларыны – **Атталаны Жамал** бла **Людмила Федченко** борчлары бегитилгендиле.

Алай бла Атталаны Жамалны кырауунда бу комиссияла болукъдула: маданият, тин хазнаны сакълау эм асламлы информация органла жаны бла; граждан обществоу институтларын айнытуу, миллетле эм динле аралы байламлыкъланы



игилендириуу, коммерциялы болмагъан секторну айнытуу; жер-жерли самоуправление, муниципал кыралууларыны жамауат палаталары эм толтуруучу власть органлада жамауат советле бла байламлыкъла журютюу жаны бла. Людмила Федченко уа жамауат

кыоркыуусузлукъну сакълау, законлукъну тутуу эм ОНК бла байламлыкъла журютюу; билим берюу, илму, жаш тёлню ишлери эм добровольчествону айнытуу; социал политика, саулукъ сакълау, физкультура эм спорт жаны бла комиссияла бла ишлерикиди.

КУЛЬЧАЛАНЫ Зульфия.

Къабарты-Малкъар Республиканы 100-жыллыгына

Иги къууум эте

Заман саргьалтхан эски суратдан келбетли кишиле къарайдыла. Ала Огъары Бахсанны сыйлы къартларыдыла. Сагъышлыдыла акъсакъалла, уллу ныгъышны таурухчулары. Ала бюгюн ары дери тюшлеринде кёрмеген, тюнлеринде эшитмеген бир аламанат затха шагъат болгъандыла.

Патчахлыкны тайдырып келген жангы власть кечелерин кюнча жарытханды. Огъары Бахсанда Кыртык сууну боюнунда гитче элетростанцияны къурулушу бошалып, элге ток берилип башланганды. Ол 1932 жылда кюз артында эди. Битеу эл жыйылган эди ол сейир ишге къараргъа. Сууну кючу бла кечени жарытыргъа боллугъун бир киши да ийнанмай эди. Ма ол кюн тюшгендиле бу огъурлу къартла суратха.

Электростанцияны Петербурдан келтиртип орнатдырган киши уа Насталаны Сохта болгъанды. Инсан урушну кезиунде ол онбиринчи аскерни

санында уруш этгенди. Ол себепден Россейде танышлары кеп эди. Аланы болушлукълары бла эки агрегат келтирген эди да, бирин Къашхатауда салдырады.

Ала артыкъ уллула туююл эдиле. Алай элде хар юйде да чыракъ жандырыргъа кючлери жетгенди. Ол заманлада Сохта КПСС-ни Къабарты-Малкъар обкомуну колхозла къурау жаны бла уполномоченныйи эди. Андан сора да, бу адам башха къуллукълада ишлеп тургъанды. Партияны Элбрус райкомуну биринчи секретары да болгъанды. Ол чынтты коммунист эди, совет власть ючюн жанын-къанын аямагъан.

Ата журт урушну кезиунде уа немисли-фашистле бла къаты сермешгенди. Аскер бөлүмлени биринде комиссар эди. Къауум кере жаралы болуп, госпитальлада жатханды.

Халкъыбыз кечюлюрюню алында биягъы жаралы болуп, журтуна къайтып тургъанлай,



аны болжаллы халда Элбрус районну секретарыны къуллугуна саладыла. Кеп да турмай кечгюнчюлюк башланады.

Аны да сынап къайтханды. Кеси уа 1979 жылда ауушханды. Суратда (солдан-онгнга) биринчи тизгинде төртюнчю киши

Насталаны Сохтады. Экинчи кишини аллындагъы сабий Сохтаны жашы Владимирди. **ОСМАНЛАНЫ Хыйса.**

КИТАПХАНА

МАХТАУЛУ АДАМЛАНЫ ЮСЛЕРИНДЕН ЖЮРЕК ЖЫЛЫУ БЛА

Бу кюнледе белгили жураналист, Къабарты-Малкъар Республиканы культурасыны сыйлы къуллукъчусу Текуланы Махайны къызы Хауаны «Жашау суратлары» деген китабы чыкъгъанды басмадан. Ол беш бөлүмден къуралгъанды.

Биринчи бөлүмге авторну суратлау хапарлары киргендиле. Алада эл жашауну, анда таматаланы, сабийлени да тиричиликлерини, дуниялыкъгъа кез къарамларыны юслеринден айтылады. Аланы бир къаууму жарыкъдыла, башхалары сагъыш этдиредиле, бары да биргелей игиликге юйретедиле. Сёз ючюн, хапарладан бирини аты «Ётмек туурамчыкъ» деп алайды. Ол къысха айтыуда болгъан адамны къылыкъ хунерин къурау кюч кеп уллу чыгъармалада жетишмейди. Сюжет ызы былайды. Жашауу келген устаз, жашчыкъланы ётмек жарты бла топ ойнагъанларын кёрюп, кесини хапарын айтады.

Ол Ленинградда ёсгенди. Фашистле ол шахарны 872 кюнню бла кечени къуршалап тургъандыла, ары не аш, не башха зат кийирмей. Бир жол ол Невагъа суу алыргъа бара тургъанлай, асыры ачдан, борбайлары тутмай, жыгъылып къалгъанды. Ол, кесине келгенде, бир тиширюу, сол къолу бла аны кесине къысып, онг къолунда уа къара ётмек туурамчыкъны аны ауузуна келтирип тургъанын кёргенди. Ол ётмек кесекчик аны жашауу къайтаргъанды. Ёлгенлени уа саны жокъ эди... Айхай да, устазны бу сёзлерин эшитген сабийле ётмек бла ойнамазла.

Китапны бу бөлүмюнде хапарланы къайсын алсанг да, хычыуундула, тиллери байды, аланы окъургъа тынчды. Чыгъармаланы жигитлери - сабийле, спектакль салыргъа сюйген школчу къызла бла жашла, туудукъ-туугъанны сейир таурухла бла къууандырыучу Билял аппа, къоншу тауукъ балачыкъланы бла къозуланы ырхыдан сакълагъан Лейля бла Аминат... Хауаны хапарларыны арасында жарыкъ чамлары бла къууандыргъанла да бардыла. Сёз ючюн, «Буслимат Къызыл майданда», «Оу, шайтан!», «Шарапийни къытайлыгъа саугъасы».

Китапны экинчи бөлүмю «Керти таулула» деген ат бла келеди. Бу бөлүмге халкъыбызны бетин кёрюзтген, махтаулу адамланы юслеринден статьяла киредиле. Хар бир аллай инсанны юсюнден автор энчи хапар айтады. Окъуй барсанг, жазыуладан аны жылыулу, бирде уа ёхтем ёню эшитиледи.

Бу бөлүмню жигитлери таныулу адамларыбыз-



дыла: жюз жыл мындан алгъа Малкъар округну таматасы болуп тургъан Энейланы Магомет, 1960-чы жыллада костыльле бла Мёчуланы Кязимни къабырын излей баргъан поэт Отарланы Керим, академикле Залийханланы Михаил бла Абшаланы Магомет, дуниягъа белгили алим Энейланы Тимур, Къабарты-Малкъарны аты айтылган къырал эм жамауат къуллукъчулары Хутуйланы Ханафий, Батчаланы Исмайыл, Чабдарланы Борис, Атакуланы Хафисат, Оракъланы Зоя, халкъыбызны махтаулу жашлары Акъайланы Хажимырза, Мисирланы Алий, Таукенланы Идирис, Борчаланы Азрет, Социалист Урунууну Жигитлери Келеметланы Шайхыйб, Моллаланы Шарафутдин, Атабийланы Магомет, кеп жылланы Кенделенде колхоз тамата болуп тургъан Мусукаланы Шамса, авторну къалам къарындашлары-егечлери Къулбайланы Алий, Батчаланы Шахидат, Хучиналаны Ануар, Холаланы Марзият,

халкъ жырчы Залийханланы Башир, кийиз этиуде уста Айтекланы Нальдиша, актриса Ахкёбекланы Фатимат эм башхала.

Текуланы Хауаны бу китабыны ючюнчю бөлүмю уа «Жигитлеге махтау!» – деп алайды. Анда Уллу Ата журт урушха къатышхан жашларыбызны бла къызларыбызны юслеринден айтылады хапар. Айхай да, ала кепдюле, статьяла тынгылыдыла. Сёз ючюн, къыралны жигитине кёрюзтюлген Къудайланы Шамшюдюнню сураты Рокосовскийни музейинде турады дегенча, дагъыда башхаланы юслеринден да аллай сейирлик шартланы, ала этген жигитликлени да суратлап, алай жазгъанды Хауа.

Жаланда бу китапда берилген жашланы араларында бир къауум лётчик барды: Байсолтанланы Алим, Черкесланы Къонакъ, Батчаланы Элдар, Жанатайланы Исмайыл, Керменланы Магометгерий...

Жашлай жоюлгъанланы ариу бетлерине къарай, бютюнда жарыйса – Таумырзаланы Хамит, Мақытланы Магомет, Тюбейланы Хаким, Бачиланы Атлы, Насталаны Хажибекир, Жантууланы Аздор, Жаболаны Асхат, Сарбашланы Солтан... Китапны бу бөлүмюнде Геляхланы Исхакъны юсюнден да тынгылы жазылады. Ол урушха дери устаз болгъанды, сабийле бла алынган сураты да бериледи.

Бир юйюрдэн Уллу Ата журт урушда къазауатха киргенледен алты къарындаш – Кенделенден Диналаны Хасан, Алий, Хусей, Ахмат, Сафар, Шарапий, Къашхатаудан Зокаланы Келлет бла Хамза, Тёбен Чегемден Малкъондуланы Хасан, Хашим, Къасым, Муталиф да жигитлеридиле бу аламанат китапны.

Таулу тиширюуладан фронтда болгъанладан бир къаууму киргендиле бери: Кереметланы Мариям, Оракъланы Фаризат, Гергюкъланы Соня, Базоланы Саният. Алагъа да айтады жылыулу сёзюн Хауа.

Бу китапны «Жашау болумла» деген кесегине уа аналитика оюмла киргендиле. Биз къалай жашайбыз? Кимди бизге юлгю? Башхаланы сынауларына къарап, тюзно, терсни айырыргъа боллукъмуду адамгъа? Ма быллай соруулагъа жууап излейди автор. Аны табар ючюн а, жашауда кеси кёрген, кеси шагъат болгъан, толу билген затладан хапар айтады.

Бу журналистни биринчи китабыды. Текуланы Хауа «Заман» («Коммунизмге жол») газетни редакциясында ишлегенли жарым ёмюрден озгъанды. Ол къагъытда (тарыхда!) къойгъан къадарланы къалай санаялгъын? Ала уа хар кимде да бир бирге ушамагъан шартладан толудула, сейирдиле. Ызы къалын болсун бу махтаулу адамланы бирге жыйгъан китапны.

МУСУКАЛАНЫ Сакинат.

АУУР АТЛЕТИКА

Даражалы эришиуге тюшерге итине

Тырныауз шахарда «Геолог» спорт комплексде, КъМР-ни Спорт министрствосу бла Ауур атлетиканы федерациясы къурап, республиканы биринчилиги ётгенди. Спортчула бу жол 34 ауурлукъ категорияда эришгендиле.

15-17-жыллыкъ кызыла бла жашла россейли даражада бардырыллыкъ эришиуге тюшер ючюн кюч-къарыуларын аймагъандыла. Алчыла, майдалла эм грамотала бла саугъалангандан тышын да, республиканы атындан тюрюлю тюрюлю эришиуге къатышыргъа эркинлик алгъандыла.

Майдаллагъа тийишли бол-



гъан штангачылары уа Россейни сыйлы тренерлери Маккаланы Махти, Джаппулары Магомет, СССР-ни спортдан устасы Муаед Шаов эм спортну

халкъла аралы класслы устасы Сабанчылары Мартин саугъалагъандыла.

ТАППАСХАНЛАНЫ Аминат.

ТИНТИУЛЕ

Эсирген водитель кесине, башхалагъа да къоркъуулду

Жылны аллындан бери эсирип, жолгъа чыкъгъан эмда машинаны жюрютюрге эркинлиги болмагъан 473 водителни ачыклагъандыла къыралавтоинспекторла, деп билдиргендиле бизге КъМР-де МБД-ны пресс-службасындан.

Полициячыла жолда жюрюуну жорукъларыны арасында эм къоркъуулу аманлыкъны этгенлени – руль артына аракы ичип олтургъанланы эмда эркинликлери болмай машинаны жюрютгенлени – бузукъчу ишлерин тохтатыгъа баш магъана бердиле.

Озгъан солуу кюнледе уа жол-патруль службаны келечилери 34 водител кеф болгъанын тохташдырып, машинаны жюрютюрге чек салгъандыла. Энтта 59 инсанни транспортну жюрютюрге эркинликлери жокъ эди.

Жылны аллындан бери уа

инспекторла 178 кеф водителни тутхандыла. Аладан 22-сирул артына эсирип къайтарып олтургъандыла, алагъа РФ-ни УК-сыны 264.1-чи статьясына кёре терслеу материалла ачылгъандыла. Машинаны жюрютюрге эркинлиги болмай да жылны аллындан бери 295 инсан ачыкъланганды.

Республиканы хурметли жамауаты! Кеф болуп машинаны жюрютген жолда жюрюуну жорукъларына эм уллу бузукълукъду. Аны этгенле жууапха тартылып, тазир телериклерин эсгертедиле инспекторла.

РФ-ни Административ бузукълукъланы кодексини 12.8-чи статьясыны 1-чи кесегине тийишлиликде, кеф, неда медицина тинтиуледен ётерге унамагъан водителни машинаны жюрютюрге эркинлиги эки жылгъа дери сыйырылыргъа боллукъду, дагъыда анга

30 минг сом тазир салынады.

Бузукълукъну къайтарып этген а 200-300 минг сом тазир телерге, 2 жылгъа дери правасыз къалыргъа, неда 480 сагъатны хакъсыз ишлеге тартылыргъа боллукъду. Сюд инсанни машинаны жюрютюрге эркинлигин 2 жылгъа сыйырыргъа, аны бла бирге юч жылны ичинде бир тюрюлю иш бла кюреширге, къуллукъда ишлерге чек салыргъа да боллукъду.

Водитель кеф болгъанына ишеклик бар эсе, неда биреу кесин жолда тапсыз жюрютсе, башхаланы жашауларына, саулукъларына къоркъуу салса, аны юсюнден бу телефон номерлеге сёлешип, билдирирге боллукъду: 8 (8662) 495062, 961000, 911096 неда 102.

Басмагъа **ТИКАЛАНЫ Фатима** хазырлагъанды.

РОСГВАРДИЯ

Бузукъчуну тутаргъа болушхандыла

Росгвардияны КъМР-де бёлуюню ОМОН-уну «Вершина» отрядыны къуллукъчулары полициячыла бла бирге Нартан элде жашагъан эр кишини юйюнде оператив жумушла бардыргъандыла. Аны кези-

уюнде наркотикле бла керох табылгъандыла, деп билдиргендиле бизге ведомствону пресс-службасындан.

Экспертиза сыйырылгъан уу марихуана болгъанын тохташдыргъанды. Юйню иеси айт-

ханыча, аны ол кесине ичерге жыйгъанды, керохну уа табып, юйюнде асырагъанды.

Нартанчыгъа уголовный иш ачылгъанды.

Басмагъа **ТОКЪЛАНЫ Фатима** хазырлагъанды.

АКЦИЯ

Хыйлачылагъа алдатмауну амалларына юйретгендиле

Элбрусну полициячылары халкъны сакъ болургъа, хыйлачылагъа кеслерин алдатмазгъа чакъыргъандыла.

ОМВД-да жамауат советни келечиси **Газаланы Зухура** бла полицияны участка уполномоченныйи майор **Бёзюланы Элдар** Тырныаузда почтаны бёлуюнде, жамауат жыйылгъан башха жерледе болгъандыла. Ала, шахарчылары танымагъан адам телефонларына сёлешсе, аны айтханына ийнанып къалмазгъа, сакълыкъны унутмазгъа чакъыргъандыла. Ала хыйлачыла ахча къоллу болур ючюн не тюрюлю мадарны да хайырлангандарын эсгертендиле. Интернетде жукъ сатып алгъанда, банк картаны тарихлерин белгили этерге жарамагъанын да айтхандыла.

Акциягъа къатышханлагъа хыйлачылыкъланы тюрюлюлери ангылатылгъан китапчыкъланы да юлешгендиле.

Басмагъа **АБДУЛЛАХЛАНЫ Фатима** хазырлагъанды.



АХШЫ АМАЛ

Физкультурагъа кёллендирир ючюн

Былыр бешинчи апрельде чыгъарылгъан 88-ФЗ номерли Федерал законнга тийишлиликде, НДСЛ налогну телечюле, физкультура-саулукъландырыу жумушлагъа этген къоранчларыны бир кесегин къайтарыргъа боллукъдула, деп айтылады МФЦ-ни интернет-сайтында.

РФ-ни Налог кодексине тийишлиликде, муну эмда башха налогланы юсю бла адамгъа артха къайтарылыргъа боллукъ ахчаны ёлчеми 15,6 минг сом бла чекленеди. Инсан аллай жумушлагъа сабийле ючюн къоранч этген эсе, аны да ары къошаргъа онг барды.

Ахчаны налог органдан неда ишлеген жерден алыргъа боллукъду. Аны этерча 3-НДФЛ

формада декларацияны берирге керекди. Анга уа физкультура-саулукъландырыу жумушланы хайырланганыгъызгъа шагъатлыкъ этген документлени эмда касса чекни къошаргъа. Аланы барын да налог органнга 2023 жылда биринчи январьдан сора жиберирге керекди. Ишлеген жеригизден а ахчаны быйыл къайтарыргъа (иш хакъыгъыздан налог тыйылмай) боллукъду. Бу закон бла праволу информацияны официальный интернет-порталында шагъа-рейленирге боллукъсуз. Аны адреси: <http://publication.pravo.gov.ru/Document/View/0001202104050039>.

УЛБАШЛАНЫ Мурат хазырлагъанды.

ЖАРСЫУ

ХАКУАШЕВ Андрей Ханашхович

Къабарты-Малкъар Республиканы маданиятына уллу бушуу сынагъа тюшгенди – КъМР-ни илмуларыны сыйлы къуллукъчусу, филология илмулары доктору, профессор Андрей Ханашхович Хакуашев 93 жылында ёлгенди.

Андрей Ханашховични аты шёндюгю миллет маданиятыны алаамат келечилерини тизмесине жазылгъанды. Ол фахмулу алим эм жазуучу, адабиятны кесаматчысы, хунерли педагог болгъанды, Илмулары халкъла аралы адыг академиясыны академиги, Россей Федерацияны бийик школуну сыйлы къуллукъчусу эди.

Хакуашев А.Х. Терк районну Арик элинде 1929 жылны 27 декабринде туугъанды. Ленинградны университетини филология факультетин бошагъанды. Анда окъугъан заманында аны ким да сукъланырча талпыныулугъу, жууаппылыгы да болгъанды. Кыралны айырмалы вузларындан биринде окъуй туруп, аны жюреги тинтиу эмда педагог ишлеге тартханын сезгенди.

Ол кыралны тюрюлю тюрюлю архивлеринде бла библиотекаларында кёп жылланы излеу ишин арымай-талмай бардыргъанды, тапхан шартланы хайырланып, «Али Шогенцуковну чыгъармачылыгы», «Биринчи адыг жазуучула», «Къуралыну башланганы» эмда кёп башха очеркле жазгъанды. 1982 жылда уа «Адыг жарыкъландырыучула. XIX ёмюрю биринчи жарымы» деген илму иши ючюн анга филология ил-



мулары доктору деген алим даража берилгенди.

Андрей Ханашхович ёсюп келген телюно окъутуугъа бла юйретиуге да уллу къыйын салгъанды. Аны ючюн заманын, кючюн да аямагъанды, билимин, жашау сынаун да кызыгъанмай бергенди. Кёп жылланы ичинде КъМКЪУ-ну къабарты тили бла адабиятны кафедрасында студентлени окъутханды. Университетни бошагъан кёп педагогла, журналистле, жазуучула, артистле, жамауат къуллукъчула, алимле аны кеслерини устазларына санагъанлары да бошдан тююлдю.

Андрей Хакуашевни республикада бирликни сакълаугъа, анда жашагъан халкъланы араларында шуёхлукъну, келишиулукъну да кючлеуге салгъан къыйыны да айтып-айтмазча уллуду. Къабарты-Малкъарны жамауатыны эсинде ол огъурлу адамча, фахмулу педагогча къаллыкъды.

КъМР-ни Маданият министрствосу, КъМР-ни Жазуучуларыны союзу.

КъМР-ни Маданият министрствосу, КъМР-ни Театрда ишлегенлерини союзу Къабарты-Малкъар Республиканы искусстволарыны сыйлы къуллукъчусу, Къулийланы Къайсын атлы Малкъар къырал драма театрын баш режиссёру **АТМЫРЗАЛАНЫ Магометге атасы АТМЫРЗАЛАНЫ Махмутну жашы Мажит** ёлгенине бушуу этгенлерин билдирип, къайгы сёз бердиле.

Журтубуз



Чукуй таш

Тауда атсыз таш, агъач да болмаз дейдиле. Кертиси бла да, кѣп затланы атлары барды, аланы асламысы бурннгудан бери сакъланыпдыла.

Аланы бир затха ушатып неда бир иш бла байламлы айтхандыла. Сѣз ючюн, Губус таш, Чек таш, Хажимурат солуучу терек, Къобан ѳсген къол эм башхала.

Суратдагы ташны аты уа Чукуй

ташды. Ол Чегем ауузунда Думалагъа баргъан жерде Къардан сууну онг жагъасындады. Къара тауну къыбыла сыртында. Башы асыры жютюден, адам аны алайгъа жонуп орнатхан сунарса. Ол тийрени къалауруча, кѣп ѳмюрледен бери сюеледи алайда.

ОСМАНЛАНЫ Хыйса.

ОНГЛА

Аш-азыкъ чыгъарыучулагъа себепликге

Хурметли предпринимательле, бизни республикада «МСП» Корпорация» акционер общество эл мюлк кооперативлеге, КФХ-лагъа, иели мюлклеге аш-азыкъ продукцияларын эмда товарларын сатаргъа болушлукъ этеди. Бу иш ол санда федерал сатыу-алыу сетьле бла байламлыкъда бардырылады, деп билдиргендиле Къабарты-Малкъар Республиканы Предпринимательствогъа себеплик этиу арасындан.

Сагъынылгъан ишни тамамлар хыйсап бла «Пятёрочка», «Перекрёсток», «Карусель», «Дикси», «МЕТРО Кэш Энд Керри», «ВкусВилл» тюкенле эмда Россей Федерацияны Центро-союзу бла келишимле этилгендиле. Кеслери тюкен ачаргъа сойгенлеге да болушурукъдула. Аллай умутлары болгъанла Бизнес-навигаторну хайырлангъа болушлукъдула. Аны Интернетде адреси буду: <https://smbn.ru>. Анда алыучула табаргъа, ортакъгъа мекям алыргъа, франшиза сайларгъа, консультацияла эмда финанс-гарантия болушлукъ алыргъа болушлукъду.

«МСП» Корпорация» ол федерал сетьле бла бирге информация-ме-




тодика материалла да жарашдыргъанды. Ала бла шагъырейленгенле келишим эте билирге, документлени электрон халда жарашдырыргъа юренирикдиле. Аланы уа **AGRO-COOP.RU** порталда табарыкъсыз.

Бу амалланы юсюнден толуракъ хапар билирге сойгенле Къабарты-Малкъар Республиканы Предпринимательствогъа себеплик этиу арасына сѣлешсинле неда барсынла. Аны адреси: **Нальчик, Киров атлы орам, 224.** Телефону: **(8662) 72-21-81.**

УЛБАШЛАНЫ Мурат хазырлагъанды.

СѢЗБЕР



ЭНИНЕ: 5. Къырал саугъа. 6. Аш юйде хайырланылгъан зат. 10. Эт аш. 11. Ат сютден этилген суусун. 12. Сютден аны къайнатмай этилген суусун. 15. Баш кийим. 18. Жумуртхадан этилген ташарыкъ. 19. Къыйын ишни этерге таукел болуу. 20. Жылы жабыу. 21. Бир оюмгъа келалмай сѣлешуу. 24. Терекни айбатлыгъы. 26. Эки бир бирге кѣлкълды болгъан адамны айыруучу. 27. Ишлерин билгенле. 31. Биченчилени къаууму. 33. «Тогуз кючю болгъан» ханс. 34. Ол дуняма жарар деп этилген иги иш. 35. Адамгъа зорлукъ сынатыу. 36. Атны къумалысы.

ЁРЕСИНЕ: 1. Адам жюрип этген гитче жолчукъ. 2. Жайда мал туруучу жер. 3. Юй башында жер. 4. Кѣнделен суу башында бек ариу жерни аты. 7. Киши кесине къошмагъан адам. 8. Эки жаны неда бир жаны жютю болгъан узун ауур темир. 9. Бахсан ауузунда эски эл. 13. Уруш этген адам. 14. Басма, радио ишчи. 16. Жаз башы къар. 17. Адрыгълыкъ этиу. 22. Келин жаулукъ. 23. Жерде уя этген къанатлы. 25. Ит жаныуарны уллу тюрлюсю. 28. Аманатха алай этгенле да боладыла. 29. Ушкок атхан аны марайды. 30. Эртте къошдан айранны аны бла келтиргендиле. 32. Соруучу излеген.

ГАЗЕТНИ 6-чы НОМЕРИНДЕ
БАСМАЛАНГАН СѢЗБЕРНИ ЖУУАПЛАРЫ:

Энине: 7. Жугъутур. 8. Къалауур. 9. Къаранча. 11. Бузукълукъ. 12. Уча. 13. Жанчыкъ. 14. Нартан. 15. Наныкъ. 17. Нота. 19. Ахшы. 21. Бала. 22. Ырхы. 25. Турукъ. 29. Орайда. 31. Махтау. 32. Тау. 33. Хуначыла. 34. Харамлыкъ. 35. Таралыу. 36. Жасалыу.

Ёресине: 1. Шумалакъ. 2. Сууалчан. 3. Бурчакъ. 4. Нарзан. 5. Малкъарлы. 6. Жубуран. 10. Черет. 11. Баки. 15. Нарат. 16. Къайыкъ. 18. Ока. 20. Шах. 21. Байтамал. 23. Ырхымлау. 24. Ургулау. 26. Уста. 27. Урух. 28. Жангылыкъ. 30. Алысын. 31. Маршал.

Жаболаны Илияс дипломун тас этгенди. Бийик билимни В.М. Коков атлы Къабарты-Малкъар къырал аграр университетде алгъанды, «Механизация и обеспечение предприятий» факультетде окъугъанды. Диплом 2013 жылда берилгенди.

Документни тапхан адам бар эсе, Илиясны атасы **Жаболаны Сафаргъа** билдиририн тилейбиз, аны телефону – **89298447307**.

Учредительле: Къабарты-Малкъар Республиканы Парламенти бла Правительствосу

Баш редактор
КЪОНАКЪЛАНЫ Хасан

РЕДКОЛЛЕГИЯ:

ТЕКУЛАНЫ Хауа
(баш редакторну орунбасары),
ЖАНГУРАЗЛАНЫ Нажабат
(баш редакторну орунбасары),
ТОКЪЛУЛАНЫ Борис
(жууаплы секретарь),
МУСУКАЛАНЫ Сакинат,
ТИКАЛАНЫ Фатима,
ТРАМЛАНЫ Зукура,
УЛБАШЛАНЫ Мурат.

ТЕЛЕФОНЛА:

Редакторну приёмный - 42-63-01. Баш редакторну орунбасарлары - 42-38-21, 40-04-82. Жууаплы секретарь - 42-66-85.
Секретариат - 40-93-62. Корректорла - 42-63-52.

Газет Басманы эм асламлы информацияны эркиниклерин къоруулау жаны бла Къабарты-Малкъар регион инспекцияда 2016 жылда 19 декабрьде регистрация этилгенди.

Регистрация номер — ПИ № ТУ07-00118. Индекс - П 5893

Газетни басмагъа «КъМР-Медиа» ГКУ-ну компьютер службасы хазыр этгенди.

Газет «Издательство «Южный регион» ООО-ну типографиясында басмаланганды.
Ставрополь край, Ессентуки ш., Никольский орам, 5а

Номерге графикге кѣре
19.00 сагъатда къол салынады.
20.00 сагъатда къол салыннганды.

ГАЗЕТНИ НОМЕРИН
ЧЫГЪАРГЪАНЛА:

Текуланы Хауа - дежурный редактор, Кучукланы Сафият, Кетенчиланы Зульфия - жууаплы секретарьны орунбасарлары; Ахматланы Люаза (1,2,3,4-чю бетле), Зезаланы Лида (9,10,11,12-чи бетле) - корректорла.

Тиражы 1558 экз. Заказ № 151
Багъасы эркинди.

РЕДАКЦИЯНЫ ЭМ
ИЗДАТЕЛЬНИ АДРЕСИ:

360000, Нальчик шахар,
Ленин атлы проспект, 5

электронный почтасы:
elbor_50@mail.ru